

四庫全書

子部

欽定四庫全書

子部

赤水元珠卷四

詳校官太醫院醫官臣姜晟

編修臣倉聖脈覆勘

總校官編修臣王燕緒

校對官編修臣王嘉曾

謄錄監生臣裘璩

欽定四庫全書

赤水元珠卷四

明孫一奎撰

腹痛門

附水鳴
小腹痛

生生子曰腹痛極要體認真切庶投劑有功有寒熱

沉脉

而遲者寒脉
浮而數者熱

有虛實

脉散大而無力者虛
脉弦而有力者實

有痰涎

滑脉

者痰沉
弦者飲

有積聚

脉沉弦而伏者積
或代或弦者聚

有虫痛

脉多沉滑
或乍大乍

小有死血

脉沉而濡
或結或促

寒痛者綿綿而痛無增減也以薑桂附子之屬溫之
熱痛者時痛而或時吐也得熱物而痛止者蓋辛熱能
沖開鬱結氣道疎通暫得少愈而陰血日虧燥火愈
熾不久復發遷延歲月此為積熱輕者以山梔黃連
白芍香附之類重者調胃承氣湯下之

虛痛者以手重按至痛處而止者是也宜參朮白芍加
溫煖藥

實痛者手不可近按之愈痛或消或下詳症施治

飲食所傷作痛者宜溫脾行氣以消導之蓋飲食得寒則滯得熱則化若痛漸下及日久不愈者宜推蕩之
詳見內傷飲食門

痰痛者必小便不利痰隔中焦氣閉下焦上下不相流通故痛治當導痰開鬱又伏飲作痛者或吐或下視形氣何如當與痰飲門相參治

虫痛者面上有白班點唇若塗硃痛後便能食時作時止詳見虫門

食積死血痛者痛有常處而不移動者是也

宜按門尋治

腹中水鳴

丹溪曰腹中水鳴乃火擊動其水也蓋水欲下火欲上相觸而然用二陳湯加苓連梔子亦有臟寒而水聲汨汨者宜分三陰部分而治中脘太陰當臍少陰小腹厥陰各從其宜溫之

又有腸胃空虛而鳴者宜參朮之類補之

腹中水鳴而痛亦有因于火因于鬱者

生生子曰觀丹溪治腹痛無定方蓋欲使人認病自擇
且方者隅也隅于一則不能圓活而貫通是以後人
有守死方之誚

凡臍下痛而人中黑者多死

感暑而痛或泄痢併作其脉必虛宜十味香薷飲或
六和湯

感濕而痛大便溏泄小便不利其脉必濡宜胃苓湯
食積痛常欲大便去後而痛減者是也宜溫宜消久者

遇仙丹神芎丸等擇而下之

當與傷食
門相參治

氣滯而痛其脉必沉宜木香順氣散

死血痛痛有常處宜桃仁承氣湯

痛而欲得熱手按及熱物熨者是寒宜香砂理中湯或

五積散

痛而熱手熱物熨不止者是熱宜黃連解毒之類實則

以硝黃下之

絞腸沙痛極是急速先與鹽湯探吐或委中并十指出

血藿香正氣散正氣天香散

酒積痛 酒傷則發宜泄其積痛自止也

多年敗田螺殼煨存性加三倍于木香檳榔丸中更
加山茵陳等分衆藥中其效甚速

禦痛湯 治火痛

黃連

薑汁炒

山梔仁

炒各二錢

橘紅

茯苓

各一錢半

草薢仁

七分

半夏

一錢四分

甘草

四分

薑三片食前服

星半安中湯

痰積作痛

南星 半夏

錢各一
半

滑石

香附

枳殼

青皮

木香

山梔仁

炒
黑

蒼朮

砂仁

茯苓

橘紅

錢各一

甘草

分四

生薑四片煎服

氣攻痛者去南星滑石加厚朴玄胡索

錢各一

痰甚者加白螺殼燒灰一錢臨服調下

木香順氣散

氣滯腹痛

木香 香附 檳榔 青皮 陳皮 厚朴

蒼朮

枳壳

炒

砂仁

各一錢

甘草

五分

薑三片煎服

香砂理中湯 即理中湯加藿香砂仁

小腹痛

傷寒家蓄血在下焦宜抵當桃仁承氣之類若因氣鬱而痛以青皮主之寒者以桂枝吳茱萸溫之若因瘀奔豚癥聚者又當循各門施治

苦楝丸 治奔豚小腹痛寒也

苦楝 茴香 大附子

三味酒煮焙乾末之每兩入玄胡末半兩全蝎炒

丁香各十八箇為末酒糊丸梧桐子大每食前溫

酒下五十丸

酒煮當歸丸 治小腹痛及疝

當歸一兩 茴香半兩 附子七錢 良薑七錢

四味酒煮乾再焙加後藥 塩炒 丁香各半兩 全蝎二錢

柴胡 升麻

木香

錢各一

苦棟

五

甘草

炙五分

玄胡索

錢四

為末酒煮糊丸梧子大每二三十丸空心白湯下

小腸癰作痛者其身甲錯腹皮急按之濡如腫狀腹常痛或遠臍生瘡急宜下之或以雲母膏太乙膏為丸服之自愈

脇痛門

有風寒

脈浮弦而數者是也

有食積

脈沉弦而伏者是也

有痰飲

或強或滑或結或促

有死血

脉瀆

有虛

脉弦而細數或大而無力

有氣鬱

脉沉而細

有火

脉洪滑而

數

當分條類析明別左右施治

經曰左右者陰陽之道路氣之所終始也又曰肝木氣實則脇痛肝氣實則怒夫謂實者指邪氣而言經曰邪氣盛則實是也

脇痛屬肝木及胆火木氣實者以柴胡川芎青皮蒼朮疎之肝火盛者以當歸龍會九瀉之死血積者以桃仁紅花香附川芎破之痰飲流注者以南星半夏蒼

木川芎謠之鬱宜開鬱寒宜散寒此大法也

兩脇走痛是痰實者可用控涎丹

方見痰飲門

左脇痛為肝經受邪宜枳芎散或柴胡疎肝散

右脇痛為肝經移病于肺宜推氣散

食積痛 凡痛有一條扛起者也當于積塊門檢治

氣弱人脇痛脉細緊或弦多從勞役怒氣得者八物湯

加木香青皮

肥白人氣虛發寒熱而脇下痛用參芪補氣柴胡黃芩

退熱木香青皮調氣

瘦人發寒熱脇痛多怒者必有瘀血宜桃仁紅花柴胡
青皮大黃滑石

去滯氣必用青皮乃肝胆二經之藥若二經血不足者
先當補血少加青皮可也

脇痛發寒熱似覺有積塊必從飲食大飽勞力所致必
用龍會丸

痰飲停伏脇痛宜導痰湯

脇下痛而大便秘結者木香枳榔丸或龍會丸

亦有虛寒而作痛者一人脇痛連膈服氣藥不效後用
辛熱補劑下黑鉛丹而愈

解痛外以琥珀膏貼之或以白芥子水研敷之或吳茱
萸醋研敷之茱萸炒熨亦佳

當歸龍會丸 肝木實火兩脇痛之要藥

當歸 龍胆草 各酒洗 山梔 黃連 黃芩 各一兩半

蘆薈 大黃 酒浸各五錢 木香 一錢半 黃柏 一兩 青皮 一兩

柴胡

五錢

麝香

少許

右末神麴糊丸梧子大每薑湯下三五十丸

枳芎散

左脇痛

枳實

麴炒

川芎

各五錢

甘草

炙一錢半

為末每二三錢薑棗湯或酒調下

推氣散

右脇痛

片薑黃

枳壳

麴炒

桂心

各五錢

甘草

炙三錢

為末每服二錢薑湯調下

鷄鳴散

跌撲損傷瘀血停積脇內日久作痛

復元活血湯

從高墜下惡血流於脇下疼痛不可忍

二方見跌撲門

柴胡瀉肝湯

鬱怒傷肝左脇痛

柴胡

一錢二分

甘草

五錢五分

芍藥

各一錢

黃連

炒

山梔

炒

龍膽草

各八分

川歸

一錢二分

水煎服

死血作痛瘦人多怒者常患此

桃仁九箇

紅花

川芎

柴胡

青皮

各一分

芍藥

香附

錢各一 歸尾 錢一

半

水煎服

治脇下氣痛神方

小茴香

一兩炒

枳壳

五錢炒

為末每二錢鹽湯調下

心痛門

真心痛者手足青至節旦發夕死夕發旦死寒邪傷其

君主也今之治例皆非真心痛也以其在心之部位而名或心之脉絡或手心主之脉絡或胃脘或胸膈或食傷或寒傷或氣逆或痰飲或死血或虫或鬱火皆致痛也

鍼經曰足太陰之脉其支者復從胃別上膈注心中是動則病舌本強食則嘔胃脘痛腹脹善噫心下急痛胃病者腹臑脹胃脘當心而痛上支兩脇咽隔不通脉經曰憂愁思慮則傷心傷心則苦驚喜忘善怒心

傷者其人勞倦即頭面赤而下重心中痛徹背其脉
弦此心臟傷所致也 諸虫痛者如心腹痛懊懷發
作腫聚往來上下行痛有休作心腹中熱善渴涎出
面色乍青乍白乍赤嘔吐清水者虵也

病機機要曰有大實而心中痛者因氣而食卒然發痛
大便或秘久而心胸高起按之至痛不能飲食急以
煮黃九利之利後以藁本湯去其邪也有寒厥心痛
者手足逆而通身冷汗出便溺清利或大便利而不

渴氣微力弱急以朮附湯溫之寒厥暴痛非久病也
朝發暮死急當救之是知久病無寒暴病非熱也

陳無擇云若謂經心痛心與背相引心痛徹背背痛徹
心若諸府心痛難以俛仰小腹上冲卒不知人嘔吐
泄瀉此皆外感內淫則其氣閉塞鬱於中焦氣與邪爭
發為疼痛又曰九種心痛曰飲曰食曰風曰冷曰熱
曰悸曰虫曰疰曰去來痛者除風熱冷屬外所因餘
皆不內外更婦人惡血入心脾經發作疼痛尤甚於

諸痛更有卒中客忤鬼擊尸疰使人心痛亦屬不內
外因在人以意推充施治

丹溪云凡心膈之痛須分新久若明知身受寒氣口食
寒物而病於初得之時當用溫散或溫利之藥若其
病得之稍久則成鬱矣鬱則蒸熱熱久必生火原病
式中備言之矣若欲行溫散溫利寧無助火添病耶
由是古方多以山梔為君加熱藥為嚮導則邪易伏
病易退然向安之後若縱恣口味病必復作凡治此病

必要先問平日起居何如假如心痛有因平日喜食熱物以致死血留於胃口作痛者用桃仁承氣湯下之

治寒之劑

金匱赤石脂丸

心痛徹背背痛徹心此寒厥心痛

烏頭

三錢炮

附子

五錢炮

蜀椒

乾薑

赤石脂

各一兩

右末蜜丸梧子大食後白湯下一九日三服

未附湯

寒厥暴痛脉微氣弱

甘草

炙一兩

白朮

四兩

附子

一兩半炮

每三錢薑棗煎

立應散

寒痛氣痛腹痛皆効

良薑

香附

各炒等分

為末白湯調下二錢

二薑丸

養脾溫胃去冷消痰治心脾痛寬胸下氣進

飲食一切冷物所傷並皆治之

乾薑

炮

良薑

等分為末麵糊丸梧子大每服十五丸至二十九
食後陳皮湯下妊娠婦人不宜服此皆溫中之藥
也

散寒之劑

麻黃桂枝湯 外因心痛惡寒發熱內攻五臟拘急不
得轉側

麻黃 桂心 芍藥 細辛 乾薑 甘草

炙各七錢半

半夏 香附

錢各五

每服五錢薑五片水煎食前服大便秘入大黃量虛實加減

一人心痛諸藥不效服此而愈

檳榔

桂心

葛根

甘草

減半

細辛

半夏

桔梗

枳壳

川芎

防風

等分水煎服

草豆蔻丸

客寒犯胃

草豆蔻

一錢半根

吳茱萸

炮

益智仁

殭蠶

炒

當歸身

青皮

各六分

神曲

薑黃

各四分

甘草

三分

桃仁

七個

半夏

一錢泡

澤瀉

一錢小便利減半

麥芽

錢半炒

炙甘草

六分

柴胡

四分詳腸痛多少與

之

人參

黃芪

陳皮

右除桃仁另研如泥外為極細末同研勻湯浸蒸

餅為丸梧子大每三十九熱湯下

食遠服

治心痛

荔枝核燒存性為末醋湯下二錢

內傷飲食之劑

煮黃丸

治飲食過多心腹脹滿脇肋走氣瘕癖刺痛

雄黃

一兩研

巴豆

五錢去皮心研如泥

入白麵二兩同研勻滴水丸梧子大滾水煮十二

九漚入冷水內令沉冷每用時用浸藥冷水下一

丸一日十二時盡十二丸以利為度不必盡劑

藁本湯

治大實心痛大便已利宜以此散其痛也

藁本

半兩

蒼朮

一兩

水煎溫服

飲食在膈上未入胃者宜吐之經曰在上者因而越之
如朮蒂散之類

氣痛之劑

正氣天香散

但忍氣則登

七氣湯

蘓子降氣湯

見氣門

治痰飲痛劑

丹溪方 痰飲停積胃脘作痛

螺蛳殼

牆上年久者煨

滑石

炒

蒼朮

山梔

香附

南星

各二兩

枳殼

青皮

木香

半夏

砂仁

各五錢

右末生薑汁浸餗餅為丸菜豆大每三四十丸薑湯下春加川芎夏加黃連冬加吳茱萸半兩

又方 治痰心痛

半夏油炒為末每服二錢薑湯下 痛甚者大陷胸湯或為丸亦可

治死血痛劑

丹溪方 治死血胃脘痛者

玄胡索

一兩半

桂

滑石

紅花

紅麴

各五錢

桃仁

三十個

右末湯浸餗餅糊為丸

桃仁承氣湯 方見傷寒門

斗門方 血氣攻心痛不可忍

蓼根剉酒浸服之瘥

治火鬱之劑

丹溪方 治火痛

黃連

山梔

炒各二錢

陳皮

茯苓

各一錢半

半夏

一錢

草豆蔻

七分

甘草

四分

薑三片水煎食前服

又方 治火痛

山梔仁

薑汁炒
一兩

水煎磨木香

三錢

或加川芎

二錢

雜方

牡蠣

煨

為末每二錢酒調下

失笑散 有人心痛百藥不效用此而愈

五靈脂 蒲黃

等分為極細末以醋調二錢熬成膏入水一盞食

前溫服有瘀血作痛加玄胡沒藥螺蛸殼陳年日
久者治心痛洗淨為末熱酒調下一錢半

乾漆丸 九種心痛腹脇積聚滯氣

乾漆二兩搗碎炒去烟細研醋煮麴糊丸梧子大每
服十五丸至十七丸熱酒下醋湯亦好不拘時日
進二服

蚕沙散 男婦心氣痛不可忍

晚蚕沙

不拘多少

為末用滾水泡過濾淨

取清水服之立止

熨法 治心腹俱痛以包川椒薄注腹上火熨令椒汗
出良

梅硫丸 酸熱以收散寒凡服辛劑反甚者改服酸劑立愈

水梅

一箇
去核

生硫黃

為末相和搗勻以可丸為度作一九白湯下立愈
病不再作

濟世方 治心痛

豨薟草搗汁醋汁相和服立效昔有人服此吐虫二

條終身不發

綠礬止痛方 綠礬七八分好酒化下再不發

衍義方 治心痛

銅青一味淡醋湯些小服之

治虫之劑

可與虫部參治

化虫丸

霍亂

檳榔

胡粉

炒苦楝根

去厚皮各五十兩

白礬

飛十兩

為末麵糊丸桐子大小兒疾病多有諸

虫或因臟腑虛弱而動或咽食甘肥而動動即腹

中疼痛往來上下攻心痛則笑不休合眼仰身撲
手心神悶亂嘔噦涎沫或吐清水四肢羸困面青
黃色飲食雖進不生肌肉或寒或熱沉沉默默不
明知病處一歲五九溫水下入香油一二點打勻
下之米飲亦得其虫自下

生生子曰已上論寒熱痰氣虫痛火食等痛治法皆已
備矣但病久正氣虛損及稟賦素弱之人或被峻利
克伐太過以致羸弱而痛不愈者皆虛痛也當從補養

氣血此根本之治不可全恃攻克以致虛虛之禍

予嘗

治于病壞之後以補藥收功者多

黃芪建中湯隨症加減 治虛弱及被克伐藥傷損者

局方蘓合丸 治症忤鬼氣卒心痛甚妙

山梔并劫藥止之不效者 玄明粉一服立止

胸滿胸痛胸痺

肝虛則胸痛引背脇實則胸痛不能轉側喜太息仲景

曰肝中寒者兩臂不舉舌本燥喜太息胸中痛不得

轉側食則吐而出汗也肝著其人常欲踏其胸上先未苦時但欲飲熱旋覆花湯主之

素問曰陽明所謂胸痛短氣者水氣在臟腑也水者陰氣也陰氣在內故胸痛少氣也

仲景治胸痺之病喘息咳唾胸背短氣寸口脉沉而遲關上小緊數者宜以瓜蒌薤白白酒湯主之

大瓜蒌

一個
搗碎

薤白

半
斤 白酒

七
升

三味同煮取二升分溫再服

一婦人患胸中痞急不得喘息按之則痛脉數且濇此
胸痺也因與小陷胸湯二劑而愈

支飲胸滿者枳朴大黃湯主之

厚朴

一兩

大黃

六兩

枳實

一兩

水五升煮取二升分溫再服

斗門方

治胸腹壅滯去痰開胃

半夏泡淨焙乾為末生薑自然汁和為餅子用濕紙
包於慢火中煨令香熟水一盞用餅子一塊如彈

子大入鹽半錢煎取一盞溫服大能去胸膈壅逆
大壓痰毒及治酒食所傷其功效大矣

一人年二十三歲膈有一點相引痛吸氣皮覺急此有
汚血也

滑石

一兩

桃仁

五錢

黃連

五錢

枳壳

一兩

甘草

炙二錢

為末每服一錢半以蘿蔔自然汁煎熟飲之一日
五六服

一人因服溫補藥又妄自學吐納以致氣亂血熱嗽血

消瘦膈間有一點氣梗痛似有一條絲垂映在腰與小腹皆痛大率偏在左邊此肝部有惡血也

滑石

枳壳

炒各一兩

黃丹

炒三錢

黃連

柴胡

各五錢

紅花

一錢

桃仁

二兩

甘草

生二錢

為末每服錢半以蘿蔔汁煎沸服之有寒邪干于胸中者宜發散之如紫蘓前胡杏仁防風桂枝葛根之類

茯苓杏仁甘草湯

治胸痺胸中氣塞短氣

茯苓

二兩

杏仁

五十箇

甘草

一兩

水一斗煮五升溫服一升一日三服

橘枳薑湯

治同上

陳皮

一斤

枳實

二兩

生薑

半斤

水五升煮二升分溫再服

千金方

治胸痺氣滿壅心膈不利

枳實

二兩

麩炒為末清米飲下二錢

仲景薏苡附子湯

治胸痺緩急

苡仁

十五兩

大附子

十個炮

為末每服方寸匕日三

旋覆花湯

治胸中嘈雜汪洋常覺冷涎泛上兀兀欲

吐飽悶

旋覆花

橘紅

半夏

茯苓

甘草

厚朴

芍藥

細辛

薑三片水煎服

虫痛

虫本濕熱所生臟腑虛則侵蝕

療寸白虫錫灰蕪荑檳榔極佳宜和中一人每覺心中
多嘈雜意欲作飲又疑虫漫依此方翌日下長虫二
條一長二尺五寸頭匾濶尾尖銳每寸作二節班如
錦紋一條皆寸斷矣

千金方云勞則熱熱則生虫心虫曰蛔脾虫曰寸白腎
虫如刀截絲縷肝虫如爛杏肺虫如蚕皆能殺人惟

肺虫為急居肺葉內蝕人肺系故成瘵疾咯血聲嘶
藥所不到治之為難道藏中載諸虫頭皆向下行惟
自初一至初五日以前頭上行故服藥多取月出以
前蓋為此也

取寸白虫方

錫灰一兩木鱉子

盧會二十文

黃丹十文輕粉十文

為末猪膏油九桐子大先一日食素晚莫喫飯次
早五更溫水調下分二服

又方

薑粉 蜜佗僧

各等分為末每二錢用麻油調服空心下頃刻成涎取下

虫蠶之生由飲食不節傷饑過飽喜啖腥膾多食生冷
酷嗜麪蘖愛食肥甘臟腑虛弱濕熱內淫則生虫積
也

三虫者謂長虫赤虫蛭虫也乃有九種而蛭人多病之

寸白虫從食牛肉飲白酒所成相連一尺則殺人服藥下之盡出乃佳蛲虫多小兒患之大人亦有令人口吐清汁痛煩躁乍作乍止其餘各種總不利於人胃中若有者宜化虫丸速除之

腹內熱腸胃虛虫行求食上唇有瘡曰惑虫食其臟下唇有瘡曰狐虫食其肛得此疾者十無一生也

寸白虫上半月虫頭向上易治下半月向下難治先以肉汁或糖蜜引虫頭向上然後用藥

集效丸

木香

竊虱

炒

檳榔

訶子

麴包煨
去核

蕪荑

炒

附子

炮去
脾

乾薑

各七
錢半

大黃

一兩
半

烏梅

十四個
去核

右末煉蜜丸麻子大每三四十九陳皮湯下

秘方萬應丸

大人小兒腹內有虫及積氣塊痛

小兒疳病

三稜

莪朮

各醋
炒

陳皮

麴
炒

橘紅

史君子肉

麥蘖麴

炒

神麴

炒

雷丸

乾漆

炒烟
盡

各五
錢

檳榔

一兩

蕪荑

二錢
半

竊虱

各
炒

胡黃連

炒

甘草

炙各
三錢

木香

良薑

陳壁土炒

砂仁

各二錢

右末醋米糊為丸菜豆大每三五十九空心淡薑

湯下

靈礬散 治小兒虫咬心痛欲絕

五靈脂末

二錢

白礬

枯五錢

每服二錢水煎服不拘時虫出即愈

安虫散 凡虫不可盡去宜安之

檳榔

胡粉

炒黃

川楝子

去皮核

鴈虱

炒各二兩

枯礬

二錢半

右末每服一錢米飲調下

川楝丸

上中二焦虛或胃寒虫動作痛

乾漆

炒烟盡二分

雄黃

五分

巴豆霜

一錢

右末麵糊丸黍米大者大小與服取東向石榴根煎湯下痛者苦楝根湯或蕪荑湯下

蕪荑散

治諸虫作痛臨發時服

白蕪荑

去扇乾漆

炒烟盡

各等分為末每一錢米飲下

化虫丸 治小兒疳虫五心煩熱

蕪荑

黃連

神麴

炒

麥蘖

炒各等分

右末麵糊丸黍米大空心米飲下

制虫制勞悅肌膚去勞熱

檳榔

一兩半

龍膽草

一兩

乾漆

五錢

為末煉蜜丸梧桐子大每十九至十五丸滾水下

木香三稜散 腹中有虫面色痿黃一切積滯

黑丑

半生半熟

大腹子

炙

檳榔

雷丸

錫灰

醋炒

三稜

煨

蓬朮

煨

木香

大黃

各一兩

為極細末每三錢空心蜜水調下或砂糖水下須
先將燒肉一片口中嚼之休嚥下吐出口中肉汁
後服藥

丹溪治蛔虫吐清水氣口刺痛取生艾汁隔夜勿食次
早五更以肥香脯方寸匕先喫令虫聞香隨即飲汁
一升必下蛔虫凡胸喉中覺有虫上下偏喜聞葱豉
油食之香者兩三日不食開口而卧將豉煎葱油令

香放口邊虫當自出引而去之但隨喜所物用之亦可

古有一人忽患一疾凡惡心則吐虫數條後乃頻作累治不效每用殺虫藥則吐虫愈多招孫尚先生診之曰六脉皆細非虫也今雖吐虫乃臟寒而虫不安失居上膈因而吐出復用殺虫藥虫為藥所苦不能自安所以虫吐愈多也硫黃附子各一兩為末粳米糊丸每服三十九飲下之五服後再不吐虫而痛亦止

仲景曰凡腹中痛其脉當沉弦今反洪大故有蛔虫熱則生虫故脉洪大

嘔吐噦門

生生子曰機要云有聲有物謂之嘔無聲有物謂之吐空嘔濁惡而聲長謂之噦要知噦屬陽而吐屬陰也無形者肺有形者胃以胃氣血言也又云上焦吐者為氣中焦吐者為食積下焦吐者為寒內經云食不得入是有火也食入復出是無火也有飽後逢怒

或傷力跌撲以致瘀血積於胃脘者有膽虛及風痰作吐者有胃虛而虫行求食者有中氣虛弱者有風寒外襲者有鬱火作痛而吐者有傷酒而嘔吐者有腳氣發而吐者惟細心體認治之無不愈矣

東垣云大便閉者通利之陰虛邪氣逆上窒塞嘔噦不足之病此地道不通也正當用生地黃當歸桃仁紅花之類和血潤燥兼用甘草以補其氣微加大黃芒硝以通其閉大便利邪氣去則氣降嘔噦自不見矣

復有胃中虛熱穀氣大虛發而為嘔噦者但得五穀之陰以和之則嘔噦自止五穀皆屬陰或食或飲白湯或喜涼水皆能止嘔噦不必用藥也治嘔吐生薑半夏橘皮必用之聖藥但只治上焦氣壅表實之病若胃虛穀氣不行胸中閉塞而嘔者惟宜益胃推揚穀氣而已勿作表實以辛藥瀉之

東垣嘔吐噦分為三陽經云嘔吐噦者皆屬於胃胃者總司也以其氣血多少為異耳且如嘔者陽明也陽

明多血多氣故有聲有物氣血俱病也

仲景云嘔多雖有陽明症慎不可下

孫真人云嘔家多服生薑乃嘔吐之聖藥也氣逆者必散之故以生薑為主吐者太陽也太陽多血少氣故有物無聲乃血病也有食入則吐有食已則吐以陳皮去白主之噦者少陽也少陽多氣少血故有聲無物乃氣病也以薑製半夏為主故朱奉議治嘔吐噦以生薑半夏陳皮之類究其三者之源皆因其脾虛

弱或因寒氣飲食所傷而致也宜丁香藿香半夏茯苓陳皮之類若但只內傷宜察其虛實使內消之痰飲者下之當分何經對症用藥不可亂也

嘔吐膈氣總論

潔古云吐有三氣積寒也皆從三焦論之上焦在胃口上通天氣主納而不出中焦在中脘上通天氣下通地氣主腐熟水穀下焦在臍下下通地氣主出而不納是故上焦吐者皆從於氣氣者天之陽也其脉浮

而洪食已暴吐渴欲飲水大便燥結氣上衝胸而發
痛其治當降氣和中中焦吐者皆從於積有陰有陽
食與氣相假為積為痛其脉浮而弦其症或先痛而
後吐或先吐而後痛治法當以小毒藥去其積枳櫛
木香和其氣下焦吐者皆從於地道也其脉大而遲
其症朝食暮吐暮食朝吐小便清利大便閉而不通
治法宜毒藥通其閉溫其寒氣大便漸通以中焦藥
和之不令大便閉結而自安也

右潔古論三焦吐蓋本黃帝所謂氣為上膈食飲入而還出為下膈食晬時乃反出之其上焦食已暴出者今世謂之嘔吐也中下二焦朝食暮吐暮食朝吐者今世謂之膈氣反胃也今分嘔吐膈食為二門仲景云諸嘔吐穀不得下小半夏湯主之

嘔家本渴渴者為欲解今反不渴心下有支飲故也小半夏湯主之

卒嘔吐心下痞膈間有水眩悸者小半夏加茯苓湯

主之胃反嘔吐者大半夏湯主之服前小半夏湯諸湯不愈者此胃虛當以甘益之立愈

治氣之劑

仲景陳皮湯 乾嘔手足厥者治宜辛散

橘紅

四兩

生薑

八兩

水七升煎三升溫服一升下咽即愈

木香散

木香 檳榔

等分為細末以後桔梗湯調下

潔古桔梗湯 上焦氣熱上衝食已暴吐脉浮洪宜先

降氣和中

桔梗 白朮

各一兩半

半夏麴

二兩

橘紅

枳實

炒

茯苓 厚朴

各一兩

每服一兩水煎調木香散二錢隔夜空腹服之三

服後氣漸下吐漸去然後去木香散加芍藥黃芪

一兩半同煎服之病愈則止如大腑燥結食不盡

下以大承氣湯去朴硝微下之少利為度再服前藥補之如大便復結又依前微下之

檳榔橘紅散 治嘔吐

白檳榔

一枚 橘紅 二錢半

水煎服

治寒之劑

加減二陳湯

痰火為患嘔噦頭眩心悸中脘不快發

寒熱或食生冷脾胃不和並治

丁香 半夏

兩

陳皮

各五兩

茯苓 甘草

二兩 半

每服四五錢薑三片烏梅一枚水煎熱服

治痰痞加草豆蔻

一兩半

藿香安胃散 脾胃虛弱不飲食嘔吐不時

藿香

一錢半

丁香

人參

各二錢

橘紅

五錢

每服二錢薑三片水煎服

東垣丁香吳茱萸湯 治嘔吐噦胃寒所致

丁香 甘草 茯苓 柴胡 半夏 乾薑

各五分

吳茱萸 草豆仁 蒼朮 黃芩 人參 各一錢

升麻 七分 當歸 一錢半

每服五錢薑三片水煎食前熱服忌生冷

藿香平胃散 治嘔吐不止

藿香 厚朴 各一兩 半夏 甘草 各二兩 蒼朮 三兩

陳皮 去白二兩

每服五錢薑三片棗三枚水煎溫服

羅太無紅豆丸 諸嘔吐逆膈氣反胃亦治寒濕

丁香 胡椒 砂仁

紅豆

各二
十粒

右末薑汁糊為丸皂角子大每一丸以大棗一枚
去核填藥麵裹燒麵熟去麵細嚼白湯下食前進

三服效

丁香附子散 膈氣吐食及下焦寒而奔豚上冲

黑附子

炮去
皮臍

丁香

各五
錢

檳榔

一大
枚

硫黃

去
石

胡椒

各二
錢

右先將四味為末次入硫黃再研勻每服二錢用
蝙蝠一箇去翅足腸肚填藥在內用濕紙五七重

裏定置慢火內燒熟取出細嚼用溫酒送下一日
三服米飲送下亦可

仲景吳茱萸湯 治嘔而胸滿者

吳茱萸

湯泡一兩半

人參

三分

生薑

一兩半

大棗

三枚

水煎

治火之劑

蘆根湯 熱而嘔吐不止及治惡阻

蘆根取土中新白者半斤水二碗煎一碗熱服

竹茹湯 治胃熱而嘔

乾葛

半夏

薑汁煮各三錢

甘草

二錢

每服五錢薑

三片

竹茹

錢半

棗

一枚

水煎溫服

昔有人病傷寒得汗後數日忽嘔吐藥食俱不得下醫皆進丁香藿香滑石等藥下咽即吐後以此竹茹湯與之即愈

枇杷散 治嘔吐利膈氣止嘔哕又治卒嘔吐不食單

煮枇杷葉汁飲之此物味苦平下氣

枇杷葉去毛人參

半夏

各一錢

茯苓

五錢

茅根

二兩

薑七片水煎磨檳榔末五分和勻服之

丹溪治膈上有熱胃中有痰二陳湯加炒梔子黃連生薑主之嘔而發熱者小柴胡湯主之溫膽湯治嘔吐不下飲食極妙

仲景青鎮丸 治寒熱往來脉弦嘔吐頭痛即小柴胡湯加青黛以薑汁打糊為丸白湯下

劉河間治暴吐上焦氣熱所冲經曰諸嘔吐酸暴注下

迫皆屬於火脉浮而洪者荊黃湯主之

荊芥

一兩

人參

五錢

甘草

二錢半

大黃

二錢

錢

右水煎調栝榔散二錢空心服

栝榔散

栝榔

二錢

木香

一錢半

輕粉

少許

右為細末同前煎藥下如欲作丸子用蒸餅糊為丸小豆大每二十九食後服

治瘀血之劑

香靈丸

又名六丁丸

治嘔吐如神及產後嘔不止者

丁香

辰砂

六錢

五靈脂

一兩

又香脂先研末後入砂再研勻用狗膽汁或猪膽

汁為丸鷄頭子大每服一九生薑陳皮湯磨下

治瘀血獨以五靈脂狗膽汁為丸鷄頭子大每服一九

生薑湯磨下及生薑酒送下極熱服

草靈丹

五靈脂

薑汁煮透

甘草

燒酒煮透

焙乾為末每服五分置掌中用舌舐下此方治膈氣反胃嘔吐梅核氣及胃脘疼痛効

治虛之劑

丹溪云久病嘔吐者胃虛不納穀也

生薑 人參 黃芪 白朮 香附

之類
治之

李澤治反胃嘔吐無常粥飯入口即吐困倦無力垂死者以人參三兩作一服水煮帶熱頓服愈

理中湯 治脾胃虛寒嘔吐不食

調中湯 治脾胃虛弱嘔吐

治中湯 治霍亂吐瀉

即理中湯加橘紅
青皮各一兩是也

六君子加砂仁治脾胃虛弱惡心欲吐及吐食或不思食

治積氣之劑

遇仙丹 木香枳榔丸 枳實導滯丸 七聖丸皆可

選用

治風痰之劑

金花丸 吐食而脉弦肝乘脾也由脾胃之虛宜治風

安胃

半夏

湯泡
一兩

枳櫛

二錢

雄黃

一錢
半

右末薑汁浸飪餅糊為丸桐子大小兒另丸薑湯下從少至多漸次服之以吐止為度風痰羈絆於脾故飲食不下也

治水飲之劑

小半夏湯 治嘔吐穀不得下者

半夏

一斤
一兩

生薑

半斤

水七升煮取一升半分溫再服

小半夏加茯苓湯 治卒嘔吐心下痞膈間有水眩悸者即前方加茯苓四兩

大半夏湯 治胃反嘔吐服前小半夏湯諸藥不愈者此胃虛宜以甘益之服此立愈

半夏二斤人參三兩白蜜一斤

右水一斗三升和蜜揚之二百四十遍煮藥取三升從服一升餘分再服

猪苓湯 治嘔吐而病在膈上後思水解急與之思水者此方主之

猪苓 茯苓 白朮

各等分為末飲調方寸匕日三

胃風

胃風之症治嘔愈嘔者是也用川烏一兩洗淨去皮臍不去尖以漿水一碗煮乾每枚切作二片復用漿水一碗煮盡更切作四片每細嚼一片以少溫水下少

頃嘔遂止此皆好食甘甜之物膏粱之味積久成熟
因而生風非一朝一夕之故也

雜方碧霞丸 治吐逆立效

黃丹四兩篩過用好米醋半斤用藥入銚內煎乾却
用炭火三斤就銚內煨透紅冷取出研細末用粟米
飯搗為丸梧子大煎醇湯下七丸效

木瓜湯 主嘔哕風氣又吐而轉筋者煮木瓜汁飲之
甚良此酸收之劑欲吐不吐者是也

惡心

丹溪云惡心有熱有痰皆用生薑隨症用藥

仲景生薑半夏湯 治胸中似喘不喘似嘔不嘔似噦

不噦徹心中憤憤然無奈者

半夏半斤生薑一斤
取汁

右二味以水三升煮半夏取二升內生薑汁同煮

二升半少冷分四服日三夜一如病止住後藥

此濕痰症也

東垣茯苓半夏湯 胃風虛弱身重有痰惡心欲吐是

邪氣羈絆於脾胃之間當先實其脾胃

炒麴

三錢

大麥芽

炒黃五錢

陳皮

天麻

各二錢

白朮

茯苓

半夏

各一兩

每五錢薑五片煎熱服

柴胡半夏湯

治舊有風症不敢見風眼澁眼黑胸中

有痰惡心兀兀欲吐但遇風覺皮肉緊手足難舉動

重如石若在暖室少出微汗其症隨減再遇風病復

如是方見痰門

嘔苦水

丹溪治一婦人清早嘔苦水脉濇而微起轉如常此胃

弱而上脘有濕

黃芩

錢七

滑石

蒼朮

炒

陳皮

山查

半夏

各一兩

桔梗

錢五

飛礬

二兩

薑水煎服

二陳湯加山梔子一倍黃連減半香附撫芎白豆仁煎

服或臨服時磨檳榔末少許治鬱火惡心

嘔沫

反胃症沫大吐者多死予目擊十數人矣

仲景治乾嘔吐逆吐涎沫半夏乾薑散主之

半夏

乾薑

各等分

二味為末取方寸匕漿水一升煎七合頓服之

嘔膿

予一族嫂中年患此半載咳嗽嘔膿血後竟無事此亦肺癰症也膿盡即愈

仲景云嘔家有膿膿不可治嘔膿盡自愈

嘔長虫

丹溪治吐虫用黑錫灰攪榔末米飲調下

仲景治魃厥當吐魃今病靜而復時煩此為臟寒魃上入膈故煩須更復止得食而嘔又煩者聞食臭出其入當自吐魃

魃厥者 烏梅丸主之又主痢 方在厥證門

傷酒嘔吐

東垣葛花解醒湯 方見傷飲門

益元散薑汁為丸治酒熱嘔惡殊驗

乾薑丸 治酒癖成飲吐酸水

乾薑 葛根 枳殼 橘紅 前胡 半夏麴

各五錢

白朮

各一兩

吳茱萸

甘草

各二錢半

右末煉蜜丸桐子大每三十九米飲下

嘔吐清水

許學士神朮丸 治嘔吐清水如神

蒼朮一斤去皮切片為末用白芝蔴半兩水二盞研

漉取汁大棗十五枚煮爛去皮核以芝蔴汁研勻

成稀膏搜和入臼搗熟丸如桐子大每空心溫湯下五十丸加至百丸忌桃李雀鴿初服時腸上微燥且以茅朮製覺燥甚再進山梔子散一服久之不覺燥也

山梔散 山梔一味乾之為末沸湯點服

仲景茯苓散 治心胸中有停痰宿水自吐出水後心胸間虛氣滿不能食消痰氣能飲食

人參 白朮

茯苓

各三兩

枳實

二兩

陳皮

五錢

生薑

三兩

三兩右水煎溫服如人行八九里許又進之一日三服

丹溪治兩手脈弦飲後嘔清水

神麴

蒼朮

香附

各五錢

益元散

兩

半夏

七錢半

右末薑汁浸餛餅為丸

丹溪治一人年四十因灸艾火太多病腸內下血糞肚

痛令痛自止善嘔清水食不下宜清胃口之熱黃

芩 甘草

茯苓

各五錢

陳皮

地黃

各一錢

白朮

連

翹

各一錢半

薑三片水煎服

仲景治渴欲飲水水入則吐名曰水逆五苓散主之

千金方治痰飲吐水無時節者其原因冷飲過度遂令脾胃氣羸不能消於飲食飲食入胃則皆變成冷水反吐不停皆用赤石脂散主之

赤石脂一斤研細末每服方寸匕酒飲調下時稍加至三七服盡一斤終身不吐痰水又不下痢補五臟令人肥健有人痰飲服藥不愈用此方愈經云

諸病水液澄徹清冷皆屬於寒是也

白芫菟散 治胃口寒作吐及作痛者

白芫仁三錢為末酒送下效

噎膈

內經陰陽別論篇曰三陽結謂之膈結謂熱結也三陽者小腸膀胱也小腸熱結則血脉燥膀胱熱結則津液涸故膈塞而不便焉其始也或由飲食不節痰飲停滯或因七情過用脾胃內虛而作或者不察悉指

為寒例用香熱之藥治之反動七情之火脾胃之陰
反有所耗是以病日益深今治此疾或見咽嗑閉塞
胸膈痞悶似屬氣滯然有服耗氣藥過多中氣不運
而致者當補氣而自運有大便秘結如羊屎者似屬
血熱然有服通利藥過多致血耗竭而愈結者補血
潤血而自行有因火逆冲上食不得入其脉洪大有
力而數者有痰飲阻滯而脉結澀者當清痰泄熱其
火自降又有脾胃陽火衰弱其脉沉細而微者當以

辛香之藥溫其氣仍以益陰養胃為之輔可也大概
又有寒熱之辨若食已即吐者火也食久始吐者寒
也王註曰食不得入是有火也食入復出是無火也
按內經王註曰少陽一陽也陽明二陽也太陽三陽
也一陽膽與三焦二陽大腸與胃三陽小腸膀胱張
子和乃曰三陽者大小腸膀胱也
并大腸而言不知從何所據耶

傷寒論云食入反吐穀不得前者腎水乾也王冰曰病
嘔而吐食久反出是無水也此與內經病能篇註異
氣厥論云膈中陽氣與寒相搏故膈食而陽氣不通此

論亦云陽與寒相搏未嘗專主於寒也

丹溪曰大率屬血虛氣虛有痰血虛者脉必數而無力
氣虛者脉必緩而無力有痰者脉必沉或伏而大又
有氣滯結者寸關沉而濇又有擊跌內積瘀血忽然
嘔吐食不能納者其脉必芤

張鷟峰曰噎當是神思間病惟內觀自養庶或可安又
曰噎生於血乾血陰也陰主靜內外兩靜則臟腑之
火不起而金水二臟有養陰血自生腸胃津液傳化

合宜何噎之有

古方用人參以補脾御米以解毒竹瀝以清痰乾薑以養血粟米以實胃蜜以潤燥薑以去噦有氣結者用開導之劑有陰火上炎者作陰虛治有積血者當消息去之

糞如羊屎者不治五十以上者不治口中多出白沫者不治

治法大醫用童便韭汁薑汁竹瀝牛羊乳氣虛入四君

子湯血虛入四物湯切不可驟用辛燥之藥宜薄滋
味宜用乾蒸餅等物少用湯粥

六節藏象云人迎四倍以上為格陽蓋陽上之極故格
拒而食不得入

金匱云病人脈數數為熱當消穀引飲而反吐者以發
其汗令陽微膈氣虛脈乃數數為客熱不能消穀胃
中虛冷故也脈弦者虛也胃氣無餘朝食暮吐變為
胃反寒在于上醫反下之今脈反弦故名曰虛

跌陽脈浮而濇浮則為虛濇為傷脾脾傷則不磨朝食
暮吐暮食朝吐宿穀不化名曰胃反脈緊而濇其病
難治

氣虛胃反右手脈無力者

四君子湯加蘆根 以伏龍肝浸長流水澄清煎之
臨服入童便韭汁牛羊乳入黑驢尿和服以防其
生蟲

參苓白朮散 錢氏白朮散皆治中氣虛弱胃反

血虛胃反左手脈無力者以四物湯加童便或再加桃
仁紅花 有酒積加甘蔗汁

二陳湯合平胃散 治有痰而胃反者

人參利膈丸 治胸中不利痰嗽喘滿而膈

木香 檳榔 各七錢半 人參 川歸 藿香 甘草 枳

實 各一兩 大黃 酒浸 厚朴 各二兩

右末滴水丸梧子大溫水送下

千葉白木槿花陰乾為末陳皮湯調下

三五口不轉再服

奇方

未出毛啄木鳥

蝙蝠

小鮎鴨魚

三味入新瓦內鹽泥固濟煨存性為末外用狗寶
為末和勻每服五七分漸至一錢薑湯下

又方 陳蜆殼燒灰米飲下

老牛涎如棗核大水中飲之終身不復噎

又方 蘆根

茅根

各二兩

水

四鍾

煮二鍾頓服之良

薑附散

膈氣不通胸膈間結塊大如拳堅如石嘔吐

惡心飲食不下

香附子

一斤生薑三斤

搗取薑汁浸香附一宿曬乾再浸再曬以薑汁盡為度為末每二錢米飲下

病機紫沈丸 治中焦吐食由食積與寒氣相格故吐

而痛

半夏麴

代赭石

砂仁

各三錢

杏仁

沈香

木香

白朮

各一錢

烏梅仁

丁香

檳榔

各二錢

陳皮

五錢

巴豆

霜

另研

肉果

各五分

右末醋糊丸黍米大每五十丸柿霜湯下愈

東垣厚朴丸

主反胃吐逆飲食噎塞氣上冲腹中諸

疾藥味即與萬病紫苑丸同

厚朴

蜀椒

去目微炒

川烏

泡去皮各一兩半

紫苑

吳茱萸

柴胡

菖蒲

桔梗

茯苓

官桂

皂角

乾薑

泡人參

各二兩

黃連

二兩半

巴豆霜

五錢

右蜜為丸桐子大每服三丸漸加至五七丸以利

為度薑湯下食後而卧此丸治效與局方溫白丸同及治處暑已後秋冬下痢大效

加減法

春夏加黃連

二兩

秋冬再加厚朴

二兩

如治風

於春秋所加黃連厚朴外更加葛蒲茯苓各一兩半如治風痛不愈者依春秋加藥外更加人參

葛蒲茯苓各一兩半

如心之積加葛蒲茯苓為

輔

如肝之積加柴胡蜀椒

如肺積加黃連人

參

如脾積加萊菔乾薑

秋冬久瀉不止加黃

連茯苓

脾胃氣弱食不消化嘔逆反胃湯飲不下用粟米半升為粉水丸梧子大煮令熟點少鹽空心和汁吞下

本事云馱尿極治反胃外臺載昔幼年經患此疾每食餅及羹粥須臾吐出貞觀中許奉御兄弟及柴蔣等時稱名醫奉勅令治醫竭其術竟不能療漸至羸癯死在旦夕忽有士云馱尿極驗旦服二合後食唯吐

一半晡時又服二合入定時食粥吐則便定後奏知
大內中五六人患反胃同服一時俱瘥此藥稍有毒
服時不可過多盛取熱服二合病深者日服之良驗

本草云駝尿治癰疽反胃又
云性冷味甘服之不生虫

濟世方 駝尿調平胃散亦效

新瓦散 治反胃用多年瓦一片燒紅入駝尿內淬二
十一次研末倉米飯焦為末二分飯末一分瓦末蠟
精和飯丸以駝尿和平胃散服之

丹溪番胃方

黃連

薑汁炒
三錢

山查肉

一錢 保和末

六錢

右粥丸桐子大以人參湯入竹瀝再煎沸熱下六
十丸

本事大黃湯 治冷涎番胃其症欲發時先流冷涎次
則吐食此乃勞症治不早死在旦夕用大黃一兩生
薑自然汁半茶盞炙大黃令燥又淬入薑汁內如此
淬汁盡切焙為末每服二錢陳米一撮葱白二莖水

一大盞煎七分先食葱白次服藥不十日即除根

羅太無云

玄明粉

硝提八九次入瓦礱煅成汁不拘再加頂火煅

其煅過淨

硝一斤入甘草末一兩和勻名曰玄明粉每用一二

錢桃花湯或葱白湯調下治膈上氣壅滯五藏秘結

邪熱 忌魚及藕

丹溪治番胃積飲通用益元散生薑自然汁澄清白脚

丸小丸子時時服 治番胃用吳茱萸貝母瓜蒌根

牛膝草

本事治積聚停飲痰水生虫久成反胃及變為胃癰其
說在靈樞及巢氏病源芫花丸

芫花

醋炙
一兩

牛膝

狼牙根

桔梗

炒

藜蘆

炒

栝榔

各五錢

巴豆

大粒
炒黑

右末醋糊丸如赤豆大每服二三丸加至五七丸
食前薑湯下

此方常服化痰消堅殺虫予患飲癖三十年暮年
常是多雜痰飲來潮遲即吐有時飲半杯酒即止

蓋合此症也因讀巢氏病源論酒癥云飲酒多而食穀少積久漸瘦其病常欲思酒不得酒則吐多睡不復能食是胃中有虫使然名為酒癥此方治之要之須痛禁酒則易治不禁無益也

羅太無桂香散 治膈氣反胃諸藥難瘥朝食暮吐甚者食已輒出其效神速此重劑也

水銀 黑錫

各三錢

硫黃

五錢

右三味銚內用柳木槌斁研微火上細研為灰取

出後用丁香末二錢桂末二錢生薑末三錢都一處研令勻每服三錢米飲調下一服效甚者再服

神效

又云男婦小兒遠近番胃吐食或有汚血停蓄胸膈者方用五靈脂一味為末以黃狗膽汁為丸龍眼大每服一丸好酒半盞溫服不止再服即效

丹溪治東陽王仲延咽膈間常覺有物悶悶每食物必屈曲自膈而下且梗瀉作微痛食亦減他無所苦予

脉之右甚濇而關甚沉左却和予曰汚血在胃脘之口氣因而鬱為痰此必食物所致明以告我彼不自覺予又曰汝去冬好食何物為多曰我每日早必單飲點剝酒兩三杯逼寒氣為製一方用生薑汁半盞令細呷之一日三服盡薑二斤而安

濟世方 治噎食

雞腹內穀袋不拘多少不可失色內物一粒用泥固濟火煨存性用薑汁炒香附末半兩配穀袋一箇為

末神麴糊為丸薑湯送下

治氣噎不下飲

枇杷葉

去毛
蜜炙

青皮

陳皮

去
白

右等分每服三錢生薑五片水煎服

金匱玉函 五噎心膈氣滯煩悶吐逆不食

蘆根五兩剉水三大盞煮二盞溫服

永徽中有僧惟則病噎不能食囑諸弟子曰吾死後便可開吾胃喉視有何物自經而卒弟子果開喉胸中

得一物形似魚而有兩頭遍體皆肉鱗弟子置碗中
跳躍不止戲以諸味皆隨化盡時夏中感藍作澱造
有一僧以澱置碗中此虫遂遠碗而走須臾化為水
此乃虫瘕非噎比因此後人多以藍治噎悞矣

秘方潤腸膏 治腸噎大便秘結飲食良久復出及朝
食暮吐暮食朝吐其功甚捷

新取葳靈仙

西兩
搗汁

生薑

西兩
取汁

真麻油

二兩

白沙蜜

西兩
熬沸

右四味同入銀石器內慢火熬成膏時時以匙挑

食之良驗

雄黃二豆丸

治番胃噎食神驗

大烏梅

三十枚水洗淨取肉

硃砂

雄黃

各二錢

乳香

一錢

真百草霜

黑豆

萊豆

各四十粒

右五味為細末烏梅肉搗丸彈子大每服一九噙

化待一炷香時藥力方行烙白麵餅一枚清熱湯

泡開吃之無碍為妙設仍有微碍一二日後再噙

一九三五丸除根

紫蘇子飲 欬逆上氣噎膈因怒氣叫喊未定便挾氣
進飲食或飲食甫畢便用性恚怒以致食與氣相逆
氣不得下或咳嗽不透心氣逆惡心

蘇子

炒

訶子

煨去核

蘿蔔子

微炒

杏仁

去皮尖

麩炒

人參

木香

各一錢半

青皮

甘草

炙各三錢

右分二服生薑三片水煎服

太倉丸

脾胃虛弱不思飲食審胃不食亦宜服之

砂仁

白豆仁

各二兩

陳倉米

一升用朝東向陽壁土炒去土不用

右末生薑自然汁丸桐子大每服百丸淡生薑湯下

體仁彙編曰硫汞結成砂子吐送立痊方用嚴氏青金

丹治一切吐逆

水銀

八錢

生硫黃

一錢

為末入鉋內慢火化開以柳木棍攪炒或有煙焰以醋沃之結成砂子再研為末用粽尖杵和丸菴豆大每服三十九生薑陳皮煎湯送下

青囊治反胃久藥不效及小兒吐不止者硫黃五錢為末入水銀二錢半同研無星為度每服二錢先取生薑汁酒一盞煎熟調藥空心服調時逐漸著酒緩調令勻服訖以被蓋出汗安

又曰人參治番胃之良用人參二兩拍破每服一兩水一鍾半煎四分熱服兼以人參汁煮粥吃愈有人患番胃諸方不瘥只服人參而愈若卒嘔吐逆凡粥飲入口即吐困弱為丸服良

劉宗厚曰按古治審胃諸方悉是香燥大熱之藥皆不足為法今姑採一二方以備用耳至於丹溪所言補血益陰潤燥和胃調中等藥雖無其方自宜隨証設施觀其立論則思過半矣

治噎禁方

皂角黃

三分每春夏兩后
樹上生如茵樣

蘆根

浮露水上
者三錢

橘紅

七分

烏藥

一錢

桔梗

二錢

枳實

八分

水二鍾煎一鍾先服一酒杯漸漸加之渣再煎

生生子曰噎膈之病氣鬱居多然亦有陰血不足者少
壯之人日以酒色是耽胃中之火沸騰則上焦肺金
先受邪矣金主降令者也火凌於肺津液成濁況又
下竭腎水將何攝伏其火以下行耶經曰大便秘者腎
之所主陰血既虧則大便秘結結則下焦閉而氣反
上冲經曰幽門不通上冲吸門又曰肺出氣腎納氣
虛則失司乃職是有陽而無陰有升而無降也故守
真子和丹溪皆以火熱而言戒用剛燥其意深矣然

用藥必假滋陰潤燥為主陰血生則大便潤潤則下
焦開開則氣降腎司賤而病尋愈矣噫用藥之法固
為詳悉然人不能鐵石其心痛斷酒色則雖日飲瓊漿
亦莫能以致其生也予特附於篇末俾病者自加珍
重孰非愈病之藥石耶

腰痛門

腰痛有腎虛有濕熱有痰有氣滯有跌撲瘀血

脉大而無力為虛弦而陰虛瀉為死血沉滑為痰沉細

為氣濡弱為濕緊數為風

東垣曰大抵寒濕多而風熱少然有房室勞傷腎虛腰痛者是陽氣虛弱不能運動故也經曰腰者腎之腑轉搖不能腎將敗矣宜腎氣丸茴香丸之類以補陽之不足也膏粱之人久服湯藥醉以入房損其真氣則腎氣熱而腰痛不能舉久則髓減骨枯發為骨痿宜六味地黃丸滋腎丸鳳髓丹之類以補陰之不足也

丹溪曰久痛必用官桂以開之方止腹脇痛亦然

煨腎丸 肝腎脾損穀不化治宜益精緩中消穀腰不

起者神效

川萆薢

杜仲

薑汁炒

牛膝

破故紙

蘆巴

兔絲

子

肉蓯蓉

沙苑蒺藜

各一兩

桂心

半兩

右酒煮猪腰子為丸桐子大每服五七十丸空心

鹽酒送下

金剛丸

腎損骨痿不能起床

川草薺 杜仲炒

照前法丸服

麋茸丸 腎虛腰痛不能轉側

麋茸

一兩鹿茸亦可用

兔絲子一兩 舶上硫黃

五錢

右末以羊腎二對酒煮爛去膜研如泥和丸梧子大陰乾如羊腎不敷入酒糊佐之每服三五十丸溫酒或鹽湯下

鹿角散 新角刮去黑皮取白者炒黃為末酒服一錢

日進三服禁生魚餘不禁陳者不用角中心黃亦不

用此方治腰痛神效

東垣曰鹿角能去惡血

羊腎散 羊腎為末酒服一錢日進三服本草云羊腎

補腎氣益精髓

腎氣丸 茴香丸 青娥丸 已上皆補陽之不足也

八味丸 治虛勞小腹拘急小便不利此則陰陽兼補也

六味地黃丸 虎潛丸 滋腎丸 大補丸 已上皆

補陰之不足也

治陰虛脈大者

杜仲 龜板 黃蘗 知母 枸杞子 五味子

等分為末以猪脊髓為丸每服五七十丸空心鹽

酒送下

補腎丸 治腎虛腰痛效

烏藥葉

本草云烏藥葉
補中益氣

側柏葉

右酒蒸晒乾為末粥丸梧子大照前服

腰腿濕痛方

龜板

酒炙五錢

黃蘗

酒炙四錢

青皮

三錢

甘草

生一錢半

右末研薑一大片次入藥末一錢研細以蒼耳汁煎令沸服

治陰虛性急腰痛者

龜板

黃蘗

知母

側柏

右為末地黃膏為丸

治濕熱腰腿疼痛

龜板

酒炙二兩

黃蘗

酒炒

蒼耳子

各一兩

側柏

半兩

葦靈仙

酒浸二兩

右以牛膝膏為丸以黑豆汁兼四物湯加陳皮生

甘草生薑一片煎吞下

又方 治腰腿疼痛

龜板

一兩半

黃蘗

白芍藥

各酒炒一兩

陳皮

知母

葦靈仙

蒼朮

蒼耳子

各半兩

為末蜜丸服

治濕熱腰痛大便瀉

龜板

酒炙 一兩

楮皮

炒

蒼朮

滑石

各半 兩

芍藥

酒浸

香附

各四錢

為末粥丸如內傷白朮山查湯下

東垣蒼朮湯

治濕熱腰腿疼痛

蒼朮

三錢 去濕止痛

柴胡

二錢 行經絡

防風

黃蘗

各一錢

水煎空心服

陳無擇牛膝酒

治傷風毒攻刺腰痛不可忍

牛膝

川芎

羌活

地骨皮

甘草

薏苡仁

各二

兩海桐皮二生地黃十兩

俱以絹袋盛入好酒二斗浸二七日夏三五日每服一杯一日三四服常令酒氣不絕為佳一法入

杜仲一兩

治痰痛以二陳湯加天南星川蘗蒼朮歲靈仙之類
丹溪治老人因跌撲腰痛

蘇木一錢歸身頭

陳皮各一錢人參黃芪木香

木通

各五分桃仁九枚

煎湯送下自然銅末子五分

脈濇者有淤血也用熟大黃湯治墜墮閃剝腰痛不能

屈伸

大黃

剝如指大

生薑

切片各半兩

二味炒令焦黃以水一鍾浸一宿五更去渣服天明取下如雞肝者即惡血也

治食積腰腿痛

龜板

酒炙

側柏葉

酒炒

香附

五錢

白芥子

凌霄花

錢半

右酒糊丸以四物湯加陳皮甘草山查莪朮青皮煎湯下

痰積食積指下有力或沈滑有力皆宜下之

治腰痛用葳靈仙此治痛之要藥為細末每服二錢以豬腰子一枚批開糝藥在內濕紙煨熟五更細嚼熱酒下千金方用葳靈仙一錢溫酒送下逐日以微利為度病人稍虛者禁用

治腰痛不可忍

牽牛不以多少研取頭末去渣取大蒜每一瓣切開
入巴豆一粒在內外用濕紙包定火煨令蒜熟去巴
豆將蒜細研和牽牛末為丸梧子大每服五丸醋湯
或茶空心送下量虛實服

藥棋子

治腰痛氣滯者

黑牽牛不拘多少以新瓦火燒赤便以牽牛倒在瓦
上自然一半生一半熟不得攪動取頭末一兩入硫
黃一分同研勻分三服每用白麵一匙水和捏如棋

子樣五更初用水一盞煮熟送下痛住即止未住明日五更再服

許學士曰予嘗有此疾每發只一服痛立止

按此二方皆濕熱痰氣壅滯不能流通故痛猛而用藥峻也此樣方法亦不可無但看病虛實用之獨活寄生湯 治腎虛弱卧冷濕地腰腿拘急筋骨攣痛或當風取涼過度風邪流入脚膝為偏枯冷痺緩弱疼痛

獨活 杜仲 牛膝 細辛 秦艽 茯苓

桂心 防風 川芎 人參 甘草 桑寄生

當歸 熟地 一方加續斷三兩

每服三錢薑五片水煎食前服

王海藏防風湯 治傷寒後腰痛或皮肉痺及腿膝疼痛行步艱難不能俛仰

防風 川芎 附子炒 當歸 芍藥 羌活 續斷

各一兩 麻黃去節 桂枝去皮 杜仲炒 牛膝 五加皮 丹

參各五錢

每五錢薑二錢煎食前服

此二方皆治寒濕之劑也

東垣川芎肉桂湯 卧寒濕之地腰痛不能轉側兩脇
搐急作痛月餘不愈腰痛論中所說皆為足太陽足
少陰血絡中有凝血作痛間有一二症屬少陽膽經
外絡病皆宜去血絡之凝乃愈

羌活一錢半

柴胡

肉桂

蒼朮

歸稍

甘草炙

川芎

錢各一

獨活

麴

炒各五分

防風

防己

各三分

桃仁

五箇去皮尖另研

水酒煎食遠熱服

陳無擇曰小續命湯加炒桃仁治風腰痛最妙

五積散加桃仁治寒濕腰痛

東垣羌活勝濕湯 治脊痛項強腰似折項似拔此足

太陽經不行也

羌活

獨活

藁本

防風

錢各一

蔓荊子

分三

川芎

分二甘草
分五

水二鍾煎溫服若身重沈沈然及經中有濕熱也
此方加黃蘗一錢大附子五分蒼朮二錢

予嘗治一人腰下濕中宮有痰腰痛而小便白濁身重
如山乃以二陳湯合五苓散以蒼朮換白朮加羌活
服之效有熱再加黃蘗木通

陳無擇桃仁酒 腎虛風勞所傷毒腫掣痛牽引小腹
連腰痛桃仁麩皮炒去皮尖研細每服一錢熱酒調

下出汗即愈

東垣地龍湯 腰脊痛或打撲傷損從高墜下惡血在
太陽經中令人腰膝痛或脛膈臂膊中痛不可忍鼻
壅塞不通

中桂

四分

桃仁

六箇

羌活

二錢

獨活

甘草

黃蘗

各一兩

麻黃

五分

地龍

四分

乾者

蘇木

六分

歸尾

一錢

每服五錢水煎食遠熱服

橘核酒

治打撲腰痛瘀血積蓄痛不可忍

用橘核炒去皮研細每服二錢酒調下或用猪腰子一枚去筋膜破開入藥同葱白茴香鹽以濕紙包煨熟嚼下溫酒送之

以上二方皆該入前打撲瘀血條下

摩腰丹 治老人腰痛及婦人白帶

附子尖 烏頭尖 天南星 各一錢半 硃砂 樟腦

丁香 各一錢半 乾薑 一錢 麝香 三分 雄黃 錢半

為末煉蜜丸如圓眼大臨用以生薑汁化開如厚糊樣火上烘熱抹掌上擦腰中候藥盡貼腰上即

烘綿衣縛之俟腰熱如火隔二日用一丸

皂角膏 治諸腰痛脚痛

用皂角一斤去皮弦搗碎好酒二大碗熬去一半濾去渣再用前汁入磁瓶內熬為膏子隨痛處貼之

如神湯 治男婦腰痛

玄胡索 當歸 桂心 杜仲

各等分

為末酒調下三錢甚者不過數服

橘核散 治腰痛諸般滯氣

橘核

乳香

各五錢

破故紙

二兩

山查

玄胡索

菴蘭

沒藥

五加皮

紅麴

各一兩

為末酒調下

丹溪治瘧疾初安因冲風又發腰痛黥又白濁已與人

參白朮檳榔半夏等補藥又教以煨牡蠣一錢木通

五分炒藥三分入前藥同煎服

痢後腰痛兩脚無力

陳皮

半夏

白芍

一錢茯苓

蒼朮

當歸

黃芩

酒炒
五分


白朮

二錢

甘草

炙一錢

薑三片煎食前服



赤水元珠卷四